



15 Janeiro 2026

Sua Exelénsia
Maria Fernanda Lay
Prezidente Parlamentu Nasionál, **Repúblika Demokrátika Timor-Leste**

Cc ba: 1. Komisaun Permanente Espesializada D – Parlamentu Nasionál
2. Bankada Parlamentar sira hotu – Parlamentu Nasionál

Sua Exelénsia Prezidente Parlamentu Nasionál,

La'ó Hamutuk – Instituto Timor-Leste ba Monitor no Analiza Dezenvolvimentu – ho respeitu no konsiderasaun as, hato'ó karta aberta ida ne'e atu partilha observasaun no apelu konstrutivu kona-ba prosesu debate no aprovasaun Proposta Lei Konkorrénsia iha faze jeneralidade iha Parlamentu Nasionál.

La'ó Hamutuk rekoñese importánsia estratéjika Lei Konkorrénsia nian ba promosaun merkadu ne'ebé justu, dezenvolvimentu ekonómiku sustentável, no integrasaun ekonómika Timor-Leste nian iha nivel regional no internasionál. Justamente tanba relevánsia ida-ne'e, ami sente iha responsabilidade sivika atu kontribui ho hanoin no konsiderasaun ba Nasaun nian intergidade hodi fortalese legitimidade, qualidade no sustentabilidade lei ida ne'e.

I. Observasaun Kona-ba Prosesu Lejizlativu

Husi perspetiva governasaun di'ak no demokrasia partisipativu, La'ó Hamutuk observa katak prosesu elaborasaun, diskusaun no aprovasaun Proposta Lei Konkorrénsia iha faze jeneralidade seidauk halibur ho sufisiénsia prinsipiu sira ne'ebé deskoñesidu iha boas-prátika internasionál, nomeadamente: Transparénsia informasaun pública, Partisipasaun efetiva sociedade sivil, Audiénsia pública formál iha nivel komisaun parlamentar no Debate substantivu ho parte interesada diretu.

Maske La'ó Hamutuk submete submisaun eskrita ba Komisaun Permanente Espesializada D, seidauk iha oportunidade sistemátika atu rona no integra perspetiva husi sociedade sivil, akadémiku, empreza lokál, kooperativa no ajente ekonómiku ki'ik sira, ne'ebé diretamente afeta husi lei ida ne'e. Esperiénsia internasionál hatudu katak konsultasaun pública alargada no avaliasaun impaktu sosiuekonómiku bele aumenta qualidade lei no hametin konfiansa pública ba instituisaun parlamentar.

II. Preokupasaun Substantiva Kona-ba Konteúdu Proposta Lei

- a) Protesaun ba empreza ki'ik, kooperativa no ekonomia informál
Proposta lei nafatin trata atividade ekonómika ho regra uniforme, seidauk fornese mekanizmu diferenciadu ka diskriminasaun positiva atu proteje empreza ki'ik, kooperativa ho natureza solidária, no ekonomia informál, ne'ebé nafatin sustenta maioria povu Timor-Leste. Iha kontestu estrutura ekonómika nasionál ne'ebé seidauk iha kbiit, lei konkorrénsia prezisa abordajem gradual, inklusiva no sensível ba realidade lokál.

- b) Risku konsentrasaun merkadu no dominasaun ekonómika
Maske proposta lei refere konseitu pozisaun dominante no dependénsia ekonómika, seidak iha garantia efetiva atu proteje ajente ekonómiku frazil sira husi prátika eksplorativu, ne'ebé bele hamosu konsentrasaun merkadu no dezigualdade ekonómika.
- c) Klaridade juridika no seguransa legal
Definisaun juridika fundamentál seidak klaru no sistemátiku, ne'ebé bele hamosu interpretasaun la-uniforme no inserteza legal iha fase implementasaun.
- d) Kapasidade no independénsia institucional
Autoridade konkorrénsia futuru prezisa hamriik ho independénsia plena, autonomia administrativa no finanseira, no kapasidade téknika adekuada. Prátika di'ak iha nivel internasionál hatudu katak independénsia regulatória mak fatór xave ba aplikasaun lei ne'ebé imparsiál no kredível.

III. Apelu Konstrutivu

Iha espíritu diálogu institucional no kolaborativu, La'ó Hamutuk apela ba Parlamentu Nasionál atu konsidera:

1. Promosaun audiénsia públika formál iha faze especialidade Proposta Lei Konkorrénsia;
2. Asegura transparénsia plena, inklui publikasaun dokumentu hotu-hotu iha pájina ofisiál Parlamentu;
3. Revizaun substantiva konteúdu lei, ho atensaun espesiál ba protesaun empreza ki'ik, kooperativa no setór produtivu nasional;
4. Estabelesimentu autoridade konkorrénsia independente, ho autonomia administrativa, finanseira no juridika;
5. Integra prinsipiu inkluziun no justisa ekonómika hanesan parte integrante husi lei.

Ikus liu La'ó Hamutuk fiar katak lei ida ne'ebé di'ak rezulta husi prosesu demokrátiku inkluzivu, deliberativu no transparente. Parlamentu Nasionál ho lideransa Sua Exelénsia, iha oportunidade importante atu hametin papél hanesan uma fukun demokrátika, hodi asegura katak Lei Konkorrénsia ne'e sai instrumentu justu, inkluzivu no benefísiu ba interese primordial Povu Timor-Leste nian.

La'ó Hamutuk reafirma nian disponibilidade atu kontinua kontribui konstrutivamente iha prosesu lejizlativu ida ne'e. Bele hetan Submisaun kompletu kona-ba proposta lei konkorensia iha file aneksu.

Ho Respeitu,



Marta da Silva



Celestino Gusmão



Charles Scheiner



Mariano Ferreira



Elia da Costa Araújo



Elivania Alves Correia



Jonathan Gonsalves